

30 këshilla se si t'ua bëjmë shprehi dhe të dashur fëmijëve namazin

Dr. Muhammed ibn Hamed El-Utejbij

Përktheu: Petrit Perçuku

Prishtinë

2024

1. Të jesh i sinqertë ndaj Allahut në edukimin e fëmijëve për faljen e namazit. Kjo arrihet kur ti si prind e kupton saktë përgjegjësinë e madhe që e ke para Allahut në lidhje me fëmijët e tu, kur ua do atyre të mirën dhe kur je i përkushtuar që ata të shpëtojnë (kur të rriten) nga dënimi i Allahut.
2. Ngjalle në zemrat e tyre lidhjen për botën tjetër duke ua sqaruar se kjo botë është kalimtare dhe jo e përjetshme, dhe se njeriu në çdo çast dhe periudhë të jetës mund të zhvendoset nga kjo botë për në botën tjetër.
3. Vazhdimisht përsërite në prani të tyre ajetin: **“A nuk e di ai (njeriu) se Allahu sheh çdo gjë?” (El-Alek, 14)** Ngjalle tek ta ndjesinë se janë nën mbikëqyrjen e Allahut, dhe se Ai është me ta me dëgjimin, shikimin dhe dijen e Tij.
4. Assesi mos lejo të kaplosh nga dëshpërimi apo të humbësh shpresën nga udhëzimi i Allahut për ta.
5. Caktoje një ditë në javë, apo më shumë për t’u ulur së bashku me ta, dhe lexojeni për shembull librin “Rijad Es-Salihin”, (apo libra tjerë të dobishëm); bekimet e kësaj ndeje do t’i vëresh mbi fëmijët e tu.
6. Bëji ata të ndiejnë se namazi është numri një në jetën e tyre dhe se çdo gjë duhet të ndalojë kur të vijë koha e namazit:

Namazi është më i rëndësishëm se studimi.

Namazi është më i rëndësishëm se shikimi i televizorit.

Namazi është më i rëndësishëm se të gjitha çështjet e kësaj bote.

Madje namazi është i pari edhe në çështjet fetare, pas teuhidit. Ti si prind bëhu shembull për ta në këtë pikë, në mënyrë që ata të mos shohin tek ti ngecje e plogështi në faljen e namazit.

7. Nëse metoda e bojkotit është e dobishme përdore atë nganjëherë si trajtim dhe ilaç, mirëpo të mos jetë i dëmshëm apo i gjatë, por bojkot i përdorur si duhet dhe i shkurtër.
8. Nëse ata falen në kohë, edhe pse ti nuk i ke urdhëruar, atëherë inkurajoji me përqafime, puthje, fjalë emocionale dhe lavdërime.
9. Gjatë kohës kur i urdhëron ta falin namazin, kësaj bashkëngjitja edhe lutjet që Allahu t’i përmirësojë, t’i udhëzojë e t’u japë sukses.

- 10.** Lidhi zemrat e tyre me Allahun dhe rrënjos tek ta bindjen se Ai i do nëse ata e falin rregullisht namazin në kohët e tij të caktuara. Mësoji ata se kush i kryen ato punë që i do Allahu, Ai e do atë, i jep sukses dhe lumturi.
- 11.** Baba, ki kujdes që detyrën për faljen e namazit nga ana e fëmijëve t'ia lësh vetëm nënës së tyre, ndërkohë që vet tërhiqesh nga përgjegjësia! Të dy ju (baba dhe nënë) jeni përgjegjës për fëmijët tuaj. Megjithatë roli yt si baba është më i madh lidhur me çështjet e namazit të fëmijëve tu.
- 12.** Bëj dallim mes atij që ende nuk ka hyrë në moshën e pubertetit dhe tjetrit që e ka arritur atë. Bëj dallim mes atij që e ka arritur pubertetin dhe është i vetëdijshëm për kohën e namazit dhe tjetrit që nuk është i tillë. Bëj dallim mes djalit dhe vajzës, sepse vajza ndodh që në disa raste të arsyetohet fetarisht për mosfaljen e namazit.
- 13.** Shpreso shpërblim dhe sevap te Allahu kur fëmijët e tu e falin namazin. Çdo namaz, çdo lexim i Kuranit, çdo dhikër dhe çdo lutje e tyre do të jetë në peshoren e punëve tua të mira në Ditën e Kiametit. Pra, shpërblimi për namazin shumëfishohet varësisht nga numri i fëmijëve tu.
- 14.** Metoda e dhuratës dhe e shpërblimit është e suksesshme dhe efektive. Përdore atë në mënyrë periodike dhe si motivim për ata fëmijë që falen rregullisht.
- 15.** Mos e bëj shpërblimin nxitjen e vetme për t'ua bërë atyre shprehi namazin, mirëpo, tregoj se duhet ta kryejnë atë rregullisht ngaqë namazi është:
- obligim
 - në të ka shpërblim të madh nga Allahu
 - i fshin veprat e këqija
 - e forcon besimin
 - i largon vesveset e shejtanit
 - është mbrojtje nga fitnet, dyshimet dhe epshet e ndaluara
 - është shkak për të hyrë në Xhenet ... si dhe dobi tjera të tij qoftë në këtë botë apo në botën tjetër.
- 16.** Tregoj se obligueshmëria e faljes së namazit kurrë nuk bie nga muslimani, as në rast të frikës, as gjatë udhëtimit, as gjatë sëmundjes. Namazi nuk falet vetëm nga gruaja me të përmuajshmet apo lehona. Ndërsa të tjerët përveç tyre, e kanë obligim ta falin namazin nëse janë muslimanë, moshërritur, të shëndoshë mendërisht, dhe namazi kurrë nuk bie nga ta, pavarësisht arsyeve që i kanë. Përkundrazi, ata duhet të falen sipas mundësive që i kanë.

- 17.** Përdore nganjëherë metodën e privimit. Privimi është dy llojesh:
- Emocional: si puthja, vëmendja, lavdërimi...
 - Material: si dhurata, pikniku, ndonjë ushqim që i pëlqen shumë etj...
- 18.** Lavdëroje para të tjerëve se si ai e fal rregullisht namazin.
- 19.** Autoriteti i urdhrit për kryerjen e namazit duhet të jetë i pranishëm tek dy prindërit.
- 20.** Jepu atyre atë që duan, kuptohet brenda kufijve të asaj që është e arsyeshme, nëse ata falin rregullisht namazin.
- 21.** Tregoju ngjarjet e brezave të parë të Islamit, e po ashtu edhe të bashkëkohësve tonë, se si ishin të kujdesshëm për namazin e tyre: kishte nga ta që për dyzet vite me radhë nuk i iku tek biri fillestar në xhami; apo tjetri ishte gjithmonë në xhami para se të thirrej ezani. Tregoju se si këta njerëz ishin të mbuluar me kënaqësi të mëdha shpirtërore, me lumturi, bereqet e sukses. Në anën tjetër, tregoju për ata që nuk falin namaz: si është jeta e tyre? Si është morali i tyre?
- 22.** Të mos jetë brenga jote vetëm se a po e falin namazin fëmijët apo jo. Përkundrazi, ngriti ambiciet tua dhe drejtoji ata që të kënaqen e ta shijojnë namazin. Tregoju se si Profeti ynë (sal-lAllahu alejhi ue sel-lem) mezi priste të hynte në namaz, ngaqë aty e gjente kënaqësinë dhe prehjen shpirtërore, dhe thoshte: “O Bilal, na qetëso me namaz!”.
- Mësoji se si duhet të jenë të përvuilur gjatë namazit, se shpirti i namazit është përvuilja në të, dhe se shpërblehesh vetëm për atë pjesë të namazit gjatës së cilës je i përvuilur e me mendje të pranishme.
- 23.** Nëse ndonjëri nga fëmijët është i shkujdesur në kryerjen e namazit, ulu vetëm me të, pastaj foli për rëndësinë e namazit dhe joshe drejt tij me çdo metodë të disponueshme. Sa rezultate të mira ka kjo ulje me të!
- 24.** Përkushtohu që fëmija yt të shoqërohet vetëm me shokë të mirë, që janë të devotshëm dhe të rregullt në faljen e namazit.
- 25.** Përdor frymëzim pozitiv për të pas çdo namazi që ai e fal.
- 26.** Preferenca jote për fëmijët të bazohet në atë se sa janë të kapur për fenë. Deklaroje këtë kriter para tyre duke u thënë: “Më i afërti prej jush me mua është ai që më së shumti e fal rregullisht namazin!”

27. Këmbëngul vazhdimisht në këto pyetje, duke përdorur shprehje emocionale:

“A e fale namazin, i dashur i babit?”

“A e fale namazin, kënaqësia e shpirtit tim?” etj.

28. Atë fëmijë që di më shumë Kuran përmendsh, caktoje nganjëherë të del imam në namaz gjatë piknikëve familjarë.

29. Vetëm fjala “falu” nuk mjafton! Tregoju se përse duhet të falen? U thua: “Faleni namazin, sepse pastaj na pret Xheneti i Allahut.” “Faluni, në mënyrë që Allahu të mburret me ne para engjëjve.” “Faluni, në mënyrë që të jemi krenari për Profetin tonë para umeteve tjera në Ditën e Kiametit.” “Faluni që ta mposhtni shejtanin.” “Faluni që të na shlyhen mëkatet.”

30. Lutja e vazhdueshme drejtuar Allahut për fëmijët.

E lusim Allahun e Lartësuar të përmirësojë fëmijët tanë dhe fëmijët tuaj!